



08. marts 2012

UPA 2012/116

Inatsisartut Suleriaasianni § 36 naapertorlugu oqallisissiaq imaattoq matumuuna saqqummiuppara.

Kalaalimernit inuiattut ilisarnaatigalugit nerisassaattita niuertarfinni akiisa apparsarneqarnissaat pillugu apeqquaqat aallaavigalugu oqallisissiaq.
(Inatsisartunut ilaasortaq Isak Hammond, Inuit Ataqatigiit)

Tungavilersuut:

Ilisimasarput tassaavoq iluarnaaruteqarniarluni sunaluunniit niiverutigineqartarmat, taamaakkaluartorli inuiattut ilisarnaatigalugu nerisassaativut kalaalermernit, akiisa pisiniarfinni qaffasippallaarnerisa inuiaqatigiinnut annertuumik sunniisarput.

Siunissaq tassaasariaqarpoq: pisariaqartitatsinnik inuussutissanik mamarisatsinnik ilitsoqqussaralugu nerisarisatsinnik akissameerpallaanngikkaluarluta pisiniarfinni pisisarsinnaanissarput.

Pingaaruteqarpoq, Kalaallit Nunaanni piniartut aalisartullu kattuffiat apeqquumi matumani qanimut suleqatigineqarluni ilusilersuisoqarnissaa, taamatullu Pilersuisoq A/S, Nunatsinni Brugseni, Pisiffik, allallu tunisassiorfiit nerisassaattitsinnik tunisassiortut qanimut suleqatigiillutik akinik ilusilersuisariaqarnerat.

Matumani aalisartumiik imaluunniit piniartumiik inuussutissat pisiarinqaranni akit maanakkutut inissisimanagerat apeqqusinngilluinnarpara, taamaattorli nerisassaattita pisiniarfinni akigilertangaasa nalimassarneqartariaqarneri suliarineqartariaqarsoraakka. Periarfissarlu ingerlariaqqiffissaasorivara: Akileraartarnermut inatsit sunniissasoq, kiisalu niueqatigiinnermi inatsisit sunniuteqassapput, taamatumuunakkut angorusullugu pisiniarfinni kalaalermernit akiisa Nunanit allanit nerisassat akiinut unammillersinnaalersissallugit.

Kissaatigiungarput tassaavoq: nerisassaattitsinnik ullormikkornit annertunerusumik nerisagalernissarput, tamannami tupinnartuunngilaq. Nerisassaativut inuussutissartaqarlualutik peqqinnartuupput, taamaammallu sapiissuseqartariaqarpugut aqqissuusseqqinnissamat.

Kikkut suleqatigiissasut ilisimavarput, kikkut isumasioqatigiissasut ilisimavarput, kikkullu nalimassaasussaasut ilisimavarput - tassalu uangut Inatsisartut sinaakkusersuinissarput, Inatsisit nalunaarutit peqqussutillu suliarinerisigut.

Matumani annertuumik eqqarsaatingaakka utoqqartavut, ilitsoqqussaralugu nerisaminnik akit pisuullutik, taamatuttaaq aamma isertitakinnerusortavut akikinnerusunik kalaaler-minernik pisinissaminnut tunuarsimaartartut. Taakkuinnaanngillammi allaammi akunnat-tunik isertitaqartut pisinissaminnut tunuarsimaartarput.

Taamaammat utoqqaat illuini, napparsimavimmi uninngasut, ulloq unnuarlu angerlarsimaffiit, meeqqat angerlarsimaffii, atuartut angerlarsimaffii, minnerunngitsumillu tungaviusumik ilinniarfiit kalaalliminernik annerusumik sassaalliteqartalersissallugit pissaavugut. Siunertaq pitsaasumik angussangutsigu inatsisitigut tungavissat suliarisariaqarput, tamannalu naammassineqassappat assigiinngitsutigut periarfissarsiussisariaqarpugut, aalisartunut piniartunullu pitsaasumik aningaasarsiornikkut toqqammaviliiniarluta.